



Broj: 01/V-05-3508/15
Datum: 19.03.2015.godine

Na osnovu člana 8.stav 2. alineja 28. Zakona o principima lokalne samouprave F BiH („Službene novine Federacije BiH“, broj: 49/06), Zakona o veterinarstvu FBiH („Sl.novine FBiH“ broj: 46/00), Zakona o veterinarstvu BiH („Sl glasnik BiH“ broj: 34/02), Zakon o zaštiti i dobrobiti životinja BiH („Sl. Glasnik BiH“, broj 25/09), Zakon o zaštiti okoliša FBiH („Sl. novine FBiH, broj 33/03 i 38/09), Zakon o javnom redu i miru USK-a („Sl. glasnik USK-a“ broj:15/10), člana 4 i 11 Zakona o prekršajima („Sl.novine FBiH“, broj: 63/14) i člana 24. stav 1. tačka 2. Statuta općine Cazin („Službene novine općine Cazin“, broj: 13/10), Općinsko vijeće općine Cazin na XXVII sjednici održanoj dana 19.03. godine, donosi:

ODLUKU O DRŽANJU I ZAŠTITI DOMAČIH ŽIVOTINJA, KUĆNIH LJUBIMACA I NEZBRINUTIH ŽIVOTINJA NA PODRUČJU OPĆINE CAZIN

I - OPĆE ODREDBE

Član 1.

Ovom odlukom propisuju se uslovi, način držanja i postupanja sa domaćim životinjama i kućnim ljubimacima koji nisu namijenjeni prodaji; kontrola razmnožavanja kućnih ljubimaca, kretanje pasa u javnim objektima i na javnim površinama, način postupanja sa izgubljenim i napuštenim životinjama, psima i mačkama-latalicama i životinjama opasnim za okolinu, registracija pasa i mačaka, nadzor, takse i kaznene odredbe.

Član 2.

Izgubljena životinja je registrovana i označena životinja koja je napustila vlasnika bez njegove volje i on je traži.

Napuštena životinja je registrovana i označena životinja koju je vlasnik svjesno napustio.

Psi i mačke latalice u smislu ove odluke su neregistrirane i neoznačene životinje o kojima se niko ne brine i koje bez nadzora lutaju ulicama i drugim javnim površinama.

Držalac životinje u smislu ove odluke smatra se svako fizičko ili pravno lice koje je vlasnik životinje, ili koje je stalno ili povremeno odgovorno ili zaduženo za životinju.

Član 3.

Domaćim životnjama u smislu ove odluke smatraju se :

- kopitari,
- papkari,
- perad

Kućnim ljubimcima u smislu ove odluke smatraju se :

- psi,
- domaće mačke,
- domaće ptice, mali glodari, tetarijske, akvarijske i druge životinje koje se drže za društvo, rekreaciju, zaštitu ili pomoći čovjeku.

Član 4.

Držalac životinje u smislu ove odluke ne može biti lice mlađe od 18 godina.

Držaoci životinja dužni su brinuti se o njihovom zdravlju, ishrani, smještaju, higijeni i prema njima postupati u skladu sa Zakonom i drugim propisima: zaštiti i dobrobiti životinja, veterinarstvu, zaštiti okoliša, javnom redu i miru, te odredbama ove Odluke.

II - USLOVI ZA DRŽANJE DOMAĆIH ŽIVOTINJA

Član 5.

Dozvoljava se držanje peradi u domaćinstvima na području općine, uz odgovarajuće sanitarno higijenske uslove prostora u kojem boravi u skladu sa Odlukom o komunalnom redu općine Cazin

Član 6.

Dozvoljava se uzgajanje i držanje kopitara i papkara na užem području grada, uz odgovarajuće sanitarno – higijenske uslove prostora u kojem borave u skladu sa Odlukom o komunalnom redu općine Cazin

III - USLOVI I NAČIN DRŽANJA KUĆNIH LJUBIMACA

Član 7.

Držanje kućnih ljubimaca na području općine se dozvoljava uz obezbjeđenje osnovnih sanitarno – higijenskih uslova i na način da se ne remeti javni red i mir.

Držanje kućnih ljubimaca uz uslove iz stava 1. ovog člana u zajedničkim stambenim zgradama, odnosno zajedničkim prostorima unutar i van zgrade dozvoljeno je uz suglasnost svih suvlasnika (vlasnika pojedinih stambeno – poslovnih prostora) i na način da se ne remeti kućni red u zgradi.

Član 8.

U gradskom području i na gušće naseljenim mjestima na području općine zabranjuje se držanje većeg broja pasa (tri i više).

U porodičnoj kući ili dvorištu porodične kuće dozvoljeno je držati pse i mačke na način da ne ometaju red i mir građana.

Pas koji se drži u neograđenom dvorištu mora biti vezan lancem na način da ne ometa kretanje i sigurnost građana ili mora biti smješten u boks koji će spriječiti nekontrolisano kretanje psa.

Držalač ne smije vezati psa na lanac koji je kraći od 3 (tri) metra ili trostrukе dužine životinje, mjereno od vrha repa do vrha njuške.

Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu.

Pas koji se drži u ograđenom dvorištu ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, a na ulaznim dvorišnim vratima mora biti na vidnom mjestu ispisana oznaka koja upozorava na psa.

Ukoliko pas iz bilo kojih razloga odbegne ili nestane sa mjesta držanja ili ga vlasnik proda,pokloni, iznajmi dužan je u roku od 48 sati prijaviti slučaj Općinskom organu uprave – Službi za opću upravu i društvene djelatnosti općine Cazin.

U istom roku od 48 sati vlasnik je dužan prijaviti uginuće, higijeničarskoj službi radi adekvatnog zbrinjavanja lešine.

Član 9.

Držaoci opasnih pasa (psi koji prema svojim prirodnim /urođenim sklonostima mogu ispoljavati agresivnost) dužni su iste držati u skladu sa pravilnikom o držanju opasnih životinja (Sl. glasnik BiH, broj : 27/10).

IV- NAČIN KONTROLE RAZMNOŽAVANJA

Član 10.

Držaoci životinja moraju osigurati kontrolu razmnožavanja životinja pod njihovim nadzorom, a za sve potomke svojih životinja snose odgovornost, te iste trebaju registrirati u nadležnoj službi u roku od 8 (osam) dana.

Držaoči pasa i mačaka moraju spriječiti nekontrolisano razmnožavanje svojih ljubimaca.
 Način kontrole razmnožavanja pasa i mačaka mogu biti :

- preventivno djelovanje (kastracija ili sterilizacija),
- kontrola kretanja ženki u vrijeme tjeranja,
- upotreba veterinarskih sredstava,

 Poslove preventivnog djelovanja i upotrebe veterinarskih sredstava iz stava 3. ovog člana obavljaju registrirane veterinarske organizacije.

V - KRETANJE PASA NA JAVNIM POVRŠINAMA I OBJEKTIMA JAVNE NAMJENE

Član 11.

3 m. Držaoči pasa mogu psa izvesti van zatvorenog prostora samo na kratkom povodniku dužine do

Opasni psi moraju se voditi na uzici i sa zaštitnom korom na njušci.

Zabranjeno je pse dovoditi u objekte javne namjene: trgovine, ugostiteljske objekte, banke, tržnice, vozila javnog prevoza, dječja igrališta, kupališta, sportske terene, groblja, javne skupove, škole, dječja obdaništa, bolnice, domove zdravlja, mesnice, vjerske objekte i slično.

O dozvoli ili zabrani uvođenja psa u hotele, apartmane i druge smještajne i ugostiteljske kapacitete i vozila javnog prijevoza odlučuje vlasnik i to označava postavljanjem naljepnice sa likom psa, odnosno s prekriženim likom psa na ulazna vrata u objekat.

Član 12.

Ograničenje kretanja pasa ne primjenjuje se na:

- pse koji imaju licence za rad i službe za obavljanje poslova pojedinih državnih, federalnih i katonalnih organa sigurnosti,
- pse osposobljene za pomoć osobama sa posebnim potrebama.

Član 13.

Držalač psa ili mačke dužan je očistiti svaku površinu koju je zaprljala njegova životinja na bilo koji način.

Ako pas ili mačka ošteti nečiju imovinu, držalač životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

Član 14.

Držalač kućnog ljubimca koji se o njemu ne može brinuti dužan je pronaći udomitelja, odnosno udruženje građana ili osobu koja će o njemu brinuti na propisan način ili ga predati skloništu za životinje kada se osnuje u skladu sa zakonom, te snositi troškove boravka do udomljenja ili drugog načina zbrinjavanja životinje.

VI - NAČIN POSTUPANJA SA IZGUBLJENIM I NAPUŠTENIM ŽIVOTINJAMA, PSIMA I MAČKAMA LUTALICAMA

Član 15.

Izgubljene i napuštene životinje skupljaju zaposleni u higijenskom servisu / skloništu za životinje kojeg u skladu sa Zakonom o zaštiti i dobrobiti životinja osnuje fizička ili pravna osoba, općina ili kanton.

Dok tijela predviđena Zakonom ne osnuju higijenski servis / skloništa za životinje, poslove sakupljanja izgubljenih i napuštenih životinja, kao i uklanjanje pasa i mačaka lutalica sa javnih površina će obavljati higijeničarska služba u skladu sa Zakonom o zaštiti i dobrobiti životinja, Zakonom o veterinarstvu, Zakonom o komunalnim djelatnostima i općinskom Odlukom o komunalnom redu.

Član 16.

Sakupljanje pasa i mačaka mora se obavljati na najprikladniji način u skladu sa važećim zakonskim propisima.

Izgubljene i napuštene životinje će biti vraćene držaćima uz naplatu troškova njihovog pronašlaska i vraćanja držaocu.

Član 17.

Zabranjeno je životinju bez opravdanog razloga ubiti, nanositi joj bol, patnju i štetu, mučiti je i namjerno izlagati stresu i strahu.

Član 18.

Usmrćivanje životinje može se provesti ako :

- je potrebno radi održavanja prirodne ravnoteže u lovištu u skladu sa zakonom o zaštiti i dobrobiti životinja i zakona o lovstvu,
- se odvija u okviru mjera za uništavanje štetočina (pasa i mačaka) koje se nekontrolisano kreću po lovištu.

Član 19.

Veterinar odlučuje o usmrćivanju životinja :

- koje boluju od neizlječive i / ili zarazne bolesti, posebno one koja može ugroziti ljude,
- su opasne za okolinu,
- su u agoniji.

Usmrćivanje se vrši u skladu sa Zakonom o zaštiti i dobrobiti životinja.

Ako se radi o kućnom ljubimcu, troškove snosi držalac, a ako se radi o psima i mačkama latalicama troškovi padaju na teret budžeta JU "Komunalno stambeni fond Cazin" i finansiraju se iz sredstava namijenjenih za obavljanje djelatnosti zajedničke komunalne potrošnje u skladu sa zakonom.

VII – REGISTRACIJA PASA I MAČAKA

Član 20.

Vlasnici pasa i mačaka obavezni su izvršiti registraciju svojih životinja u Općinskom organu uprave – Službi za opću upravu i društvene djelatnosti općine Cazin, u roku od 8 dana od dana nabavke, te su iste dužni trajno označiti pomoću mikročipa i okovratnika u skladu sa odredbama Zakona o zaštiti i dobrobiti životinja i veterinarstvu.

Vlasnik zatečenih postojećih životinja obvezan je izvršiti registraciju u roku od 30 dana od dana primjene ove Odluke.

Takse za registraciju pasa naplaćuje se u iznosu od 20 KM na račun budžeta općine Cazin.

VIII - NADZOR

Član 21.

Komunalni redari i komunalni inspektorji općine Cazin vrše nadzor nad provođenjem odredaba člana 2. člana 4, 5, 6, 7. stav 1., člana 10. stav 1, 3 i 4, člana 12. i člana 20 stava 1. ove Odluke.

Pripadnici MUP - a USK - a, Druga policijska uprava – Policijska stanica Cazin u skladu sa svojim ovlaštenjima vrše nadzor u slučajevima kršenja odredaba ove Odluke koje su uredene Zakonom o javnom redu i miru i Odlukom o javom redu i miru.

Veterinarska inspekcija u skladu sa svojim ovlaštenjima vrše nadzor u slučajevima kršenja odredaba ove Odluke koje su uredene Zakonom o veterinarstvu i Zakonom o zaštiti i dobrobiti životinja.

IX - KAZNENE ODREDBE

Član 22.

Novčanom kaznom od 1.000,00 – 4.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 5, 6, 7. i 8. stav 1.

Novčanom kaznom od 200,00 – 800,00 KM, za prekršaje iz ovog člana kaznit će se i odgovorno lice u pravnom licu.

Član 23.

Novčanom kaznom od 200,00 – 1.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14.

Novčanom kaznom od 40,00 – 200,00 KM, za prekršaje iz ovog član kaznit će se i odgovorno lice u pravnom licu.

Član 24.

Novčanom kaznom od 500,00 – 1.500,00 KM, kaznit će se za prekršaj obrtnik ako postupi protivno ili se ne pridržava odredaba iz člana: 5, 6, 7. i 8. stav 1.

Novčanom kaznom od 100,00 – 300,00 KM, kaznit će se za prekršaj obrtnik ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14.

Član 25.

Novčanom kaznom od 300,00 – 1.000,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 5, 6, 7. i 8.

Novčanom kaznom od 40,00 – 200,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14.

Član 26.

Novčanom kaznom od 20,00 – 4.000,00 KM, kaznit će se za prekršaj fizičko lice, ako postupi protivno ili se ne pridržava odredaba iz člana 20.

Novčanom kaznom od 500,00 – 7.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana 20.

Novčanom kaznom od 50,00 – 2.000,00 KM, kaznit će se za prekršaj odgovorno lice u pravnom licu, ako postupi protivno ili se ne pridržava odredaba iz člana 20.

X - PRIJELAZNE I ZAVRŠNE ODREDBE

Član 27.

Danom stupanja na snagu ove Odluke prestaju da važe ranije doneseni propisi kojima je regulisana ova problematika.

Član 28.

Ova Odluka stupa na snagu osmog dana od dana objavljivanja u Službenim novinama općine Cazin.

Dostaviti:

1. Općinskom načelniku,
2. Općinskom pravobraniocu,
3. Službi za inspekcijske poslove,
4. Službi za stručne poslove OV-a,
5. JU "Komunalno – stambeni fond" Cazin 2x,
6. JKP "Čistoća" Cazin 2x,
7. Evidencija,
8. Arhiva.

